

植物名實圖考

植物名實圖考卷之二十八

固始吳其濬著

蒙自陸應穀校刊

羣芳

風蘭 又一種

獨占春

雪蕙

朱蘭

春蘭

虎頭蘭

朵朵香

雪蘭 又一種

夏蕙

小綠蘭

太綠蘭

蓮瓣蘭

元旦蘭

火燒蘭

大理風蘭

五色蘭

大硃砂蘭

小硃砂蘭

佛手蘭

天蒜

蘭花雙葉草

紅花小獨蒜

黃花獨蒜

羊耳蒜

鴨頭蘭花草

鷺鷥蘭

象牙參

小紫含笑



風蘭

風蘭生雲南作叢望之如碧蘆葉微苞莖潤肥對排花與淨瓶
無異此種植之盆缶亦茂



風蘭 一名淨瓶

風蘭生雲南臨安橫根根上先生綠實大如甜瓜有棱形似田
家礪碌實上生長柄二葉葉闊寸許光潤無瑕中軸莖開花先
有黃籜籜坼落而花見色皓潔如雪蘭中二瓣窄細舌有黃粉
邊茸茸如翦絨莖花欹弱翩反欲舞懸之風中不萎桂馥札璞
五月開曰淨瓶似瓜生石上兩葉一大一小廣寸許花如雪蘭
而小卽此



獨占春

獨占春與虎頭蘭花同而色白潤潔無纖縷心有稀疎褐點開久近帶處微頰幽香雖乏靜趣彌長一莖一花葉細柔同素心蘭其兩三花者爲雪蘭



雪蕙

雪蕙生雲南一枝數花秋末開



朱蘭

朱蘭雲南山中有之葉光潤似銅紫蘭而寬冬間初紅漸淡有香



春蘭

春蘭葉如甌蘭直勁不欹一枝數花有淡紅淡綠者皆有紅縷
瓣薄而肥異於他處亦具香味



虎頭蘭

虎頭蘭碩大多紅絲心尤斑斕有色無香能耐霜雪又一種色
綠無紅縷者名碧玉蘭將殘始露赤脈